

## [Творение господина смиренного мниха Иеразма.]

Благослови, отче!

Богу отцу и присносущному слову божию, и пресвятому и животворящему духу, единому божию естеству, безначалному, купно в троицы въспеваему и славимому, и почитаемому, и превозносиму, исповедаемому, и веруемому и благодаримому, Содетелю и творцу невидимому и неопи-санному, искони самосилному, обычною си премудростию совершающему и строящему всяческая, и просвещающему и прославляющему, еже хотящу своим самовластием. Яко же бо исперва сотвори на небеси ангелы своя, духы и слуги своя, огонь палящъ, умнии чинове, безтелесная воинства, их же неисповедимо величество есть, тако и вся невидимая сотвори, о них же недостижно уму человеческому. Видимая же небесныя стихия сотвори: солнце, луну и звезды. И на земли же древле созда человека по своему образу и от своего трисолнчнаго божества подобия тричисленно дарова ему: ум и слово и дух животен. И пребывает в человецех ум, яко отецъ слову; слово же исходит от него, яко сын, посылаемо; на нем же почивает дух; яко у коегождо человека изо уст слово без духа исходити не может, но дух с словом исходит, ум же начальствует. И да не продолжим слова в твари человечестей, но на подлежащее возвратимся.

Бог же безначалныи, создав человека и подчте, и надо всем существом постави, и любя же в человечестем роде вся праведники, грешныя же милуя, хотяи бо вся спасти и в разум истинныи привести. Егда же благоволением отчим и своим хотением и споспешеством святаго духа единныи от троица сын божиий, не ин ни инак, но тои же бог слово, сын божиий, благоволи родитися на земли плотию от пречистыя девица Мариа, и бысть человек, еже не бе, не преложив божества; еже бе, на земли ходя, никако же отчых недр отлучися. И во страсть его и божественное его естество безстрастно пребысть. И безстрастие же его неизреченно есть, и невозможно никакою притчею сказати, ни мощно к чесому приложити, зане же вся тварь его есть, в твари же его разумеваем безстрастие, ибо аще какову древу стоящу на земли, солнцу же с небеси сияющу на нь, в ту же годину древу тому, аще ключится посекаему быти, и сим страдати, ифир же солнечныи от древа того не отступит, ни посекается з древом, ни стражет. Глаголем убо о солнце и о древе, понеже тварь его есть, Зижитель же и Содетель неизглаголим есть. Сеи убо пострада за ны плотию, грехы наша на кресте пригвозди, искупив ны (от) миродръжителя лествца ценою, кровию своею честною. О сем бо рече сосуд избранныи Павел: „Не будете раби человеком, куплени бо есте ценою“. По распятии же господь наш Иисус Христос, тридневно въскресе и в четыредесятныи день вознесесе на небеса и седе одесную отца и в пятидесятныи день от отца послав дух святыи на святыя своя ученикы и апостолы. Они же всю вселенную просветиша верою, святым крещением.